

savio dil Consejo, contradicendo, atento è una consuetudine di tuor soldi 8 per botega il capitano di la Piazza, ch'è uno Zaneto Morexini, e mostrò do termenation fate per li Procuratori, e cussì si oserva in ogni terra al tempo di le Fiere etc. Li rispose sier Sebastian Moro el Consier, che li Procuratori non ha libertà di meter angarie a la Piazza, qual è dil Dominio, et che dito capitano tuo' e di frute e di altro, et è mal fato; ha ducati 100 a l'anno di salario, li pol bastar. Et sier Lorenzo Loredan procurator, dil Secenissimo, si levò in piedi dicendo alcune parole, che li Procuratori à il cargo di la Piazza. Hor il Moro compite; andò la parte: 59 di no, 126 de si, 4 non sincere, et fu presa; la qual si ha a meter a Gran Consejo. Et nota. Per questa angaria, li favri non hanno voluto venir in Piazza, che sempre sono venuti, et questi è stà causa di meter tal parte.

Fu posto, per sier Antonio Mocenigo savio ai ordeni, solo, do galie al viazo dil trafego con don ducati 2500 per galia, zoè con certi capitoli, sicome nel dito incanto appar.

314\* A l'incontro, li 4 Savii ai ordeni, messeno do galie al viazo di Alexandria con don ducati 2500 per galia, zoè ducati 1500 di Avogadori extraordenari, ducati 500 sora i Officii, ducati 500 di l'oficio di X Officii, e possi scontar in li mendi etc. la muda 15 Octubrio a meter banco a di primo Lujo, et confinà il Capitano a di primo Avosto, parti a di 3, con altre clausule, *ut in incantu*, al qual mi riporto.

Et sier Hironimo da cha' da Pexaro, el Consier, Provedador a l'Arsenal, intrò in la parte di diti 4 Savii ai ordeni, con questo li mendi debano essi Patroni pagar.

Andò in renga primo sier Antonio Mozenigo, parlò per la sua opinion; li rispose sier Hironimo Zane suo colega. Andò le parte: 23 dil Mocenigo, 114 dil Pexaro, et 4 Savii ai Ordeni.

Fo fato eletion di 3 Exatori et uno Governador dil dazio dil ferro per eletion, con salario di ducati 60 a l'anno, et si dovea far do Exatori a le Cazude; ma per esser sier Stefano Contarini, fo Provedador a le biave, compagno dil Doxe, uno di quelli, qual è poverissimo, fo termenato, per la Signoria, lasarlo ancora in ditto officio aziò habi da viver; il qual adesso, ch'è caldo grandissimo, va con vesta di volpe: è di anni 80.

Di Liesna, vene letere di sier Zacaria Valaresso conte et provedador, di 15. Come 4 fuste di turchi è in quelli mari; hanno trovato navi-

lii con subditi nostri suso, et quali aveano gropi di danaro, et diti turchi non li ha voluti tochar, dicendo el Signor è in bona paxe con la Signoria et loro non la voleno romper; siehè non hanno fato danno a' nostri, ma ben a altri che trovano, *ut in litteris*.

Di Veia, di sier Marco Antonio Contarini procurator, di 23. Come Domenica, fo a di 20, essendo venuti alcuni turchi per danizar apresso Segna, quel ban, era li per nome dil re di Hongaria, ussite fuora con alcuni cavali, et fo da' ditti turchi preso e tajatoli per la testa; per il che quelli di la terra dubitando, si reduseno a la custodia di Segna. Et perchè il conte Bernardin Frangipani, qual Segna è stata di la caxa soa, par voy recuperarla, per il che ditti di Segna hanno mandato noncii a lui Provedador di Veia, domandandoli soccorso come quelli è in bona amicitia con il re suo di Hongaria; unde esso Provedador, non volendo far alcuna cossa senza ordine nostro, ha expedito questa barcha apostata per intender el voler di la Signoria nostra, qual suplicha presto li sia fato a saper.

Eletion di 3 Exatori, uno a le Raxon nuove, 315  
uno a le Cazude, et uno ai tre Provedadori sopra i officii, et chi haverà più balote sarà primo.

CAZUDE † Sier Marin Bondimier, fo Cao di XL, qu. sier Bertuzi . . . . .	111. 60
RAXON NUOVE † Sier Lorenzo Salamon, el XL, qu. sier Piero . . . . .	110. 64
Sier Vetor Bragadin, fo Cao di XL, qu. sier Pellegrin . . . . .	83. 85
Sier Zuan Arimondo, fo 5 di la Paxe, qu. sier Zorzi . . . . .	68.114
Sier Vidal Vituri, fo podestà a Muran, qu. sier Andrea . . . . .	55.116
Sier Hironimo Sagredo, fo podestà a Parenzo, qu. sier Marin . . . . .	62.109
Sier Zuan Moro, fo di sier Antonio, fo al Formento in Rialto . . . . .	52.116
Sier Zuan Sagredo, fo extraordenario, qu. sier Piero . . . . .	83. 85